

儀  
顧  
堂  
題  
跋

儀顧堂題跋卷十四

歸安陸心源剛甫撰

宋拓聖教序跋

宋拓聖教序余所見不下數十本以王良常積書巖藏本爲最十年前曾見之章紫伯明經許以價昂未得此本瓊蠟精良墨光如漆轉折鋒銳纖毫畢具與王本無異洵北宋拓本之至精者王本翦損二十字此則完具無損尤可貴也門下士魏稼孫推爲天下第一當不誣耳

唐釋懷素山水帖跋

懷素山水帖宋徽宗內府物爲書譜所載八十七種之一江村消夏簪于錄是帖世有二本一刊于三希堂完善無缺後有趙文敏跋一卽此本中缺兩字前明爲項墨林所藏康熙中歸高江村又經梁蕉林篴江上王儼齋鑒定者也

越州石氏本爭坐位跋

越州石氏歷代名帖有顏魯公爭坐位帖見陳思寶刻叢編王述庵稱宋以來坐位帖刻本有七而獨遺石氏可見流傳之罕矣此本墨光如漆神采煥然爲莫雲卿舊藏與祭姪祭伯文寒食鹿脯帖白香山詩簡柳公權泥甚帖同裝與叢編石氏帖目合其爲石氏所刻無疑安師文吳中復刻石久亡今惟存關中本轉輟傳摹視此有霄壤之別郭僕射爲郭英乂梓編考訂已詳菩提寺長安左街官寺見唐會要唐制凡國忌西京八十一州各於寺觀行香設齋見唐六

典廣德二年裴冕爲左僕射郭英乂爲右僕射見通鑑裴僕射者冕也

越州石氏本祭伯文祭姪文跋

右宋榻顏魯公祭伯文祭姪文艸與爭坐位帖鹿脯帖寒食帖柳公權泥其帖白香山詩簡同裝皆越州石氏博古堂帖也其口見寶刻叢編祭伯文後此惟刻于王氏鬱岡齋祭姪文後此凡五刻文氏停雲館吳氏餘清齋董氏戲鴻堂東昌邵氏及翻刻停雲本也祭伯文與王刻大抵皆同祭姪文多與諸刻歧異初頗疑之反覆推求乃得其故蓋吳刻出于鮮于伯機所藏與此本皆以真跡上石鮮于本悉仍原草一筆不遺此則或刪塗改之字或移旁注于中故字形

有大小之殊字數有多寡之別異流同源非二本也  
文刻出于聶雙江家藏墨迹相傳以爲米臨小有參  
差固無足怪翻文本原草爾之首觀句爾之二字譌  
作東二卜爾幽宅譌作及爾幽宅則以所據文刻非  
初拓本爾上有石裂紋之字僅存二點與爾字牽連  
而下卜字左右裂紋尤多摹刻者不諳文字成此大  
謬戲鴻本改易行款全失本眞鄧刻稱以聶氏墨本  
入石然與翻文本譌謬皆同蓋鈎填之贗鼎也祭姪  
文草白當推此爲第一下眞蹟一等惟常字下原字  
上缺十字恨無宋拓可補耳

閣立本北齊校書圖跋

唐閣立本北齊校書圖絹本重設色一人坐胡牀脫  
帽方落筆左右侍者六人四人其一榻陳飲具其一  
下筆疾書其一把筆若有所營其一欲逃酒爲同舍  
挽留之且使侍者着韉與山谷畫記脗合惜南宋時  
已失後半具范石湖跋中今并山谷畫記亦佚幸有  
石湖及陸放翁韓無咎郭季勇謝昌國諸跋可證流  
傳有緒耳石湖名成大吳郡人謚文穆宋史有傳卒  
紹熙四年年六十八跋雖不著年月証以同時諸跋  
當爲文穆五十以後書淳熙中文穆嘗充金國祈請

使故有奉使之印韓元吉字無咎號南澗開封雍邱人寓居湖州官至吏部尙書爵穎川郡公湖州府志寓賢有傳印曰穎川郡侯其時尙未晉封郡公也詩載南澗甲乙稿索處二字集作北方當是後人所改南澗生于重和元年跋題淳熙八年則六十四歲書也先渭南伯號放翁又號龜堂山陰人宋史文苑有傳卒嘉定二年年八十五跋題淳熙八年則五十七歲書也郭見義字季勇河南人官南安府學教授江西通志有傳謝諤字昌國學者稱良齋先生爵清江縣開國伯宋史有傳楊誠齋集有墓碑故其印曰良

齋謝諤曰昌國曰清江開國也圖與隔水綾相接處有甯江軍承宣使之印跋與隔水相接處有康州觀察使印鄂州之印信州之印承宣使舊名節度觀察留後政和七年改諸州觀察使沿唐制皆武臣也見宋史職官志宋人喜以官印印書畫如王右軍行書第一帖在王禹偁家以門下省印印之見米芾畫史四印亦猶是也跋紙有鎮江府印紹興襄陽府印隆興府印紹興府印建炎太平州印當由收藏之人歷知四府一州故耳曰京西南路經畧安撫使曰京西南路馬步軍都總管襄陽府之兼官也隆興府管內

觀察使印乾道江西路安撫使印建炎江西路馬步  
軍都總管印隆興府之兼官也□□□越州管內觀  
察使印建炎浙東安撫使印建炎浙東路都總管司  
之印紹興府之兼官也鎮江府觀察使印鎮江府之  
兼官也宋史職官志渡江後官印多亡失禮部更鑄  
給之加行在二字或冠年號以別新舊其不冠年號  
者尙是北宋舊印其冠以建炎隆興紹興乾道年號  
者南渡以後所重鑄也元時爲柯九思所藏有丹丘  
□□四字朱文印 國朝爲梁蕉林相國所藏有蕉  
林書屋棠邨審定家在北潭等印後歸怡賢親王有

怡親王寶明善堂珍藏書畫記印同治初乃歸周耆  
農侍郎自跋甚詳侍郎身後王益吾祭酒介紹以朱  
提三百兩歸于余



汝南公主墓誌跋

虞永興汝南公主墓誌草唐白麻紙本有李西涯王  
弇州文休承諸跋王文二公皆泥于書史旁注小字  
一語旣疑爲王摹又疑爲米臨余謂皆非也書史云  
汝南公主銘起草洛陽王護處見摹本後十年在故  
相張公孫直清處見眞迹其後止貞觀十年十一月  
丁亥朔十六旁注小字云赫赫高門在裴丞相家是  
其銘其前標紅綾色如新有幾玄題其標云是草在  
張直清家銘在裴丞相家分爲二明甚所云旁注小  
字當卽注于標綾之上與前題標綾一律非注于誌

草可知宋宰相無姓裴其人唐諸裴爲相者十六人裴丞相者唐相也旁注小字必出唐人或卽幾玄筆亦未可知前標旣失後注之小字安能獨存二公之疑亦考之不審矣張彥遠歷代名畫記唐有宏文之印印書者其印至小今誌草有宏文之印僅方寸許與名畫記合則曾入唐御府收藏矣至宋而爲張直清汝欽所得米老書史屢及之入元而歸于郭北山後有米老跋見周密雲烟過眼錄紙尾有天錫二字白文方印金城郭氏朱文方印其卽北山所藏草窗所見無疑後又歸于鮮于伯機故有樞字朱文方印

鮮于樞伯機甫白文方印漁陽私記白文方印明正  
德中爲陸水村尙書完所得李西涯毛憲清王文莊  
三跋皆爲水邨作也水邨敗歸于王弇州有貞元二  
字朱文連珠印及兩跋文文水莫雲卿俞允文張鳳  
翼陳眉公嚴徵諸題皆爲弇州作也入

國朝爲山陰沈氏所得築寶虞樓儲之同治中乃歸  
于余據雲烟過眼錄原有米老跋惜今失之耳李西  
涯毛弇州文文水毛憲清張伯起陳眉公俞允文莫  
雲卿陸水村明史皆有傳王鴻儒字懋學南陽人成  
化鄉試第一丁未進士仕至南京戶部尙書卒諡文

莊見萬姓統誼

巨然長江圖真蹟跋

右長江圖不著畫人姓名絹本水墨以工部營造尺  
度之長五丈高一尺四寸起雪山訖鎮江府前有雙  
龍圓印宣和朱文長印頂墨林祕玩朱文方印平生  
真賞朱文方印當時皆騎縫蓋于隔水綾上今隔水  
綾已失印祇存其半陸文裕跋董香光跋皆題于別  
紙前有頂墨林家珍藏朱文長印構李項氏士家寶  
玩朱文長印頂墨林鑑賞章朱文長印亦皆存其半  
每遇州軍古迹山寨朱筆題名案宣和畫譜山水門  
載長江圖二一爲王晉卿千里長江圖一爲巨然長

江圖晉卿以金碧擅長此非其倫昔之評巨然畫者  
曰淡墨輕嵐曰蒨鬱芊綿曰溫潤秀逸似爲此卷寫  
照其爲宣和所藏巨然長江圖無疑陸文裕以爲南  
宋董香光以爲北宋卞令之書畫彙攷以爲夏珪皆  
考之未審也朱標地名以荊州爲荆南府乃孝宗以  
後改名當爲後人所加書法甚拙與宋時戶口冊相  
似意者靖康之亂爲軍官所得而令吏胥填註歟

蘇文忠公書昆陽城賦跋

此蘇文忠公四十四歲時自書所作也是歲公由徐州移知湖州言者劾公詩文謗訕命皇甫僎到湖追攝入月十八日就逮至十二月廿九日獄具責授黃州團練副使或謂九月廿五日獄事方急豈有閒情及此不知公學識造邁不以利害動心雖爲群小所陷而意氣自如何遺稱公在獄中哲宗遣小黃門視狀適就寢鼻息如雷於此可見公處憂患氣象若謂一遭排擠卽百事俱廢亦淺之乎視公矣參寥與公交最密亦坐公得罪書此遺之亦猶獄中寄子由詩

意乎集中所刻與此微有不同名人著作屢易其稿  
集刊乃晚年定本此猶中年所書益證其爲真跡也

朱文公上時宰二劄跋

朱文公二劄真迹三韓下令之舊藏書畫彙考著于錄有明人陳廖李吳四跋按朱子年譜淳熙五年八月差知南康軍六年三月赴上請祠不報六月請減星子縣稅請祠不報七月申省自劾劄祇敘請祠減稅二事未及自劾事當是六月中七月前與再請祠狀同上所謂今有劄目申懇是也宰輔編年錄淳熙五年三月壬子史浩左丞相十一月甲戌罷丁丑趙雄右丞相宋史雄傳熹累召不出雄請處以外郡南康之除薦由于雄劄謂略敘謝誠者此也是時王淮

未相史浩早罷其爲上趙雄無疑陳廖二跋皆考之  
未審也是年參知祇錢良臣一人二公者或指良臣  
與樞密王淮歟年譜八年八月改除提舉兩浙常平  
茶鹽十二月視事正月巡歷紹興婺州衢州奏劾金  
華上戶朱熙績不伏賑糶有狀載文△劄中豪民卽  
指熙績淮亦金華人故有丞相于里社間之語後劄  
爲上王淮固矣惟事在九年正月陳跋以爲八年者  
亦誤耳劉堯夫字涓叟江西金溪人涓熙二年進士  
除國子正遷太常博士官至隆興府通判著有井蘩  
齋集見江西通志及吳文正集涓叟師事陸象山兄

弟楊誠齋嘗薦于王淮與文公同在六十人之列後  
叛象山而逃于佛朱陸文集語錄中屢及之蓋文公  
素與之善故以關白託之時淳叟未遷常博故云國  
正也陳敬宗字光世正統八年年六十七廖莊字安  
止景泰二年年四十八李東陽字賓之成化乙巳年  
三十九吳寬字原博成化甲辰年五十明史皆有傳  
茲不贅



張文靖與路允迪札跋

張守字子固又字全貞毘陵晉陵人官至參知政事  
謚文靖宋史有傳路允迪名公弼以字行宋城人建  
炎二年簽書樞密院事爲言者論罷提舉洞霄宮三  
年五月起爲兩淮制置使七月落職提舉江州太平  
觀四年七月乙丑是月辛丑朔乙丑實廿五日復端明殿學士紹  
興十年以南京留守陷金七日不食死見宰輔編年  
及繫年要錄宋制無以白衣領宮觀者同時張澂亦  
以宰執責授祕書少監想允迪落職亦有祕監之授  
故曰提宮祕監也兀朮于建炎四年渡江將自運河

引舟北歸趙立辭慶扼其衝遂于六合築台而北見  
宋史帝紀及忠義傳故曰江北殘虜扶攜北歸舍舟  
遵陸也趙立以漣水軍鎮撫使兼知楚州辭慶以天  
長軍鎮撫使兼知高郵州劉位以滁濠鎮撫使屯泗  
州之招信縣其子綱以閤門舍人知泗州故曰郵楚  
之趙辭泗之劉也趙辭劉之授鎮撫使皆在建炎四  
年五月至八月而辭慶殉于揚州九月而趙立殉于  
楚州劉位于六月克滁州八日而爲張文孝所害子  
綱代領其衆趙辭宋史有傳餘詳繫年要錄金人之  
北也慶坳之六合立破之于楚州故曰雖無大捷隨

力取勝也建炎三年七月兀朮尚未北歸五年七月趙鼎皆已死札題七月廿五則建炎四年七月廿五日也文靖方以是年五月參大政允迪尙領宮祠想來書有求知州之意故答以明已有人云云也是日允迪卽復端明文靖身在政府不便明告故以以俟光寵四字爲隱語耳三帥當指張浚張俊韓世忠趣劉當指趣劉光世督淮南兵救楚州事時呂頤浩新免呂病未差當指頤浩范宗尹獨爲僕射丞相當指宗尹梁汝嘉時爲常州通判至紹興二年始遷運副見本傳及臨安志知婺州傅子駿名崧卿山陰人宋

史有傳知溫州趙億知衢州章思永皆見浙江通志  
知嚴州范世延見宋刊嚴州圖經趙子砥知台州見  
宋史本傳及嘉定赤城志而浙江通志失載莊安常  
知處州見仲并浮山集莊公行狀浙江通志亦失收

張文靖與梁仲謨札跋

案梁汝嘉字仲謨處州麗水人宋史有傳紹興二年除直龍圖閣知杭州以稱職進徽猷閣待制試戶部侍郎五年進顯謨閣直學士三月兼兩浙西路安撫使六年八月五日除戶部侍郎見潛說友臨安志及本傳文靖于紹興二年九月知福州五年八月召赴行在見梁克家三山志仲謨之兼安撫在五年三月文靖之赴召在五年八月札題九月七日則紹興五年之九月七日也文靖之由福州除提舉萬壽宮兼侍讀也有辭免兩劄故云再上一章未報也辭免第

二劄有臣今迺遷至衢州聽候指揮語由衢州而朱池由朱池而桐廬皆福州至杭必由之路也改除詔旨據辭免劄于五年七月二十四日奉到則交替起發當在八月故三山志云八月召赴行在也八月晦至衢九月七日至桐廬時地正合

張文靖與仲仁郎中札跋

文靖兩知紹興初任在紹興二年二月再任在紹興  
十年八月見宋史本傳及嘉泰會稽志其再知也由  
知洪州移毘陵人再辭免知紹興府劄云二十日起  
發迤邐至浙東乞赴闕奏事劄云已自衢婺州前去  
與札中昨已次婺語合乞奏事劄又云乞許臣到任  
後赴闕奏事與似聞已許奏事語合時朝廷遣三使  
括諸路財韓球在會稽領五十餘萬文靖入覲爲上  
言之見本傳與帑藏一空語合辭免知紹興劄云衰  
疾纏綿春夏增劇股肱之郡益非所堪與病瘁不堪

郡寄語合到任謝表云扶衰就道觸熱之官與攜帑  
觸熱語合札中有數日可到官下語札尾題十四日  
而不著何月証以會稽志紹興十年八月任及謝表  
二十四日到任語則此札爲紹興十年八月十四日  
無疑也李燾字仁甫紹興八年進士宋史有傳一字  
仲仁見楊誠齋集謝謬墓碑疑卽其人

張文靖與王巖起札跋

王傳字巖起山東蓬萊人所居曰樂齋嘗寓江西之上饒紹興五年官左儒林郎福州路安撫使幹辦公事文靖薦狀稱其學問不苟識趣亦高五月召對除宣德郎尋降知無錫縣二十六年以張滙薦通判臨安府廿六年八月爲朝請郎廣南提舉旋遷右朝請大夫提舉江西茶鹽二十九年十月乞祠主管台州崇道觀三十年以王淮薦知建州明年改知太平州見繫年要錄江西通志呂本仁東萊集毘陵集曰計議者巖起必嘗任樞密院計議官耳文靖不以書名

惟陶南邨書史稱其字畫圓熟流美世不多見四札  
導源南宮誠如陶氏之評曾爲長洲謝滄湄

松洲

所

藏有青笠綠簑齋藏六字朱文長印滄湄精于賞鑒  
世廟嘗出內府所藏命之鑒別一一不爽見

國朝詩別裁今參攷羣書語多有據其爲真迹無疑  
滄湄精鑒良不誣也

跋宋拓紹興米帖殘本

宋高宗哀集米元章墨迹刻爲十卷劇蹟皆萃焉見  
董史宋書錄袁伯長清容居士集其石藏秘閣牌石  
庫見陳騭中興館閣錄明時尙存內府 本朝康熙  
中存一片王虛舟曾見之虛舟題跋涿州故大學士  
馮銓藏有第九卷卷首篆書標題米芾篆隸第九卷  
末有紹興辛酉奉聖旨摹勒上石兩行計篆書惟周  
王撫萬邦四十行漆書竹簡八行猗猗嗟皎皎五行  
天地元黃十一行芾皇恐得手示爲慰十一行王兄  
收可大用八行繼皇佳勳十二行篆至籀乃至作七

行隸書智慧清淨經十五行正大譯金剛般若經序  
二十四行漢札有三發筆者九行隸須師宜官四行  
王荆公信筆若無意七行法雲佛國禪師八行侍下  
冲茂六行太易英俊十三行陸謹庭藏有第二卷卷  
首篆書標題曰米芾行書第二卷末與卷九同計芾  
頓首再拜大尹尙書龍圖鈞席八行芾頓首再拜子  
方司勳尊兄閣下十三行芾依赦繼絕應敕律赦令  
十七行芾頓首再拜知府內閣侍郎台座十一行芾  
頓首再啟吾丈久鬱經綸八行芾頓首再拜知府資  
政右丞鈞席十四行良款而行役相仍十四行芾頓

首同官作姻七行芾啟久違每深景仰十四行芾頓  
首適承尊誨十二行芾頓首再拜內閣侍郎台座三  
十行芾頓首兩應想佳快五行芾啟昨日少款英論  
六行姜紹書藏有第三卷皆摩窠書見韻石齋筆談  
何義門藏有二卷皆臨二王艸書見楊大瓢偶筆趙  
晉齋法帖彙目載一卷凡十九札皆行書米帖全本  
固不可見殘本亦如星鳳其可考見者六卷篆隸一  
卷摩窠書一卷臨二王二卷行書二卷四卷不可考  
此六札爲莫雲卿舊藏與越州石氏帖顏白柳諸迹  
同裝凡臨謝太傅八月十五帖八行太宗跋謝公眞

迹山林妙寄六行芾頓首再拜前日辱甲兄國士之  
訓十行芾頓首蒙教惠茶十二行芾頓首邂逅得相從十  
行芾頓首再拜迺故人過壘十二行又出馮姜趙何  
陸諸本之外惜前後皆缺未能定爲何卷耳

儀顧堂題跋卷十五

歸安陸心源剛甫著

趙文敏秋郊飲馬圖跋

右秋郊飲馬圖右角上題秋郊飲馬圖秋字上蓋趙字朱文方印右角下有大雅二字朱文長印惜經詞截祗存大字左角上題皇慶二年十一月子昂下用趙氏子昂朱文方印左角下有柯九思陽文墨印以工部營造尺度之高八寸五分長二尺一寸五分絹本重設色秋林疏樹野水長隄一朱衣奚官持竿驅馬就飲馬几十立水者一踏沙者三在陸者三一爲

奚官所乘隔岸馳逐者二工綴之中天然秀逸無一  
毫俗氣此文敏所以不可及也汪柯玉珊瑚網卞令  
之書畫彙考皆著于錄生平所見文敏書如徐壽蘅  
侍郎之與中峯十札景劍泉閣學之妙法蓮花經秦  
談如都轉之臨右軍四帖費昶懷庶常之千字文酒  
德頌及余之洛神賦稼說與袁伯長札皆無上妙品  
畫則所見皆僞真迹僅此一卷耳

趙文敏詩翰跋

右趙文敏和任叔實韻寄衛山甫並簡瞻載五律二  
首白麻箋本有湯雨生錢警石姚伯昂等七人題愚  
案任士林字叔實家奉化松林鄉人稱松鄉先生其  
先蜀綿竹人宋少師希夷之後八世祖始居奉化再  
徙崎山趙子昂鄧善之袁伯長咸推其文大德間攜  
家華亭與衛山齋善有訪山齋詩至大初舉爲安定  
書院山長明年卒衛謙字有山一字山甫號山齋宋  
進士調丞永嘉元授漳州龍溪尹辭升温州路治中  
復辭建義莊贍宗族及鄉里之貧者建義學教願學

而無師者鄧善之趙松雪皆與爲文字交名人韻士  
遊其門者無虛日著有讀易管見三十卷見顧清松  
江府志叔實之赴華亭志稱在大德間時子昂爲浙  
江儒學提舉由奉化至松江不必取道湖州故曰枉  
道過訪志稱叔實與山齋善今以詩証之則叔實之  
攜家華亭山齋實招之也松江府志郡守表大德至  
大間有賈汝舟詩中所稱賈太守當卽其人詹載疑  
卽其字攷之志乘事蹟無一不合其爲眞迹無疑貞  
愍雅士警石通人鑒定不謬也

跋趙書小楷靈寶度人經大梵莊詠儀式

趙文敏小楷靈寶度人經大梵莊詠儀式合裝一卷  
爲吳氏兩壘軒所藏靈寶經題皇慶元年春正月旣  
望三教弟子趙孟頫載書後題詒封開府儀同三司  
上清眞人大法司今年九十有四嗣君欽承光寵守  
慈儉之教演道德之源命書是經爲壽其副藏之天  
目山中峯精舍水陸道場展誦集福莊詠儀式題曰  
中峯本師于天目道場會校諸經命書此供閱翰林  
學士承旨知制誥同修國史吳興趙孟頫識末有管  
公樓孝思道院儒釋道三教眞經朱文長印靈寶經

之首有松雪齋朱文長印天水郡圖書朱文長印子  
昂識下有趙氏子昂朱文方印愚案二篇非同時所  
書靈寶經題皇慶元年時子昂五十九歲官翰林侍  
講學士延祐三年進翰林學士承旨元制侍講讀曰  
同修國史承旨則曰兼修國史既題承旨仍曰同修  
不可解也同字豈誤筆耶儀同不著姓名當爲張留  
孫之父九德留孫于世祖時封元教宗師後加大宗  
師武宗時封大真人三代皆一品九德本貴溪士族  
以留孫故起家至江東宣慰同知受一品封見留孫  
碑惟元制道教封號有法師宗師大宗師真人大真

人之稱無以師爲司者司字豈筆誤耶或謂道陵嫡裔皆封大真人安見儀同三司非張與材愚謂與材于成宗時嗣封武宗時授金紫光祿大夫封留國公卒延祐三年見江西通志及元詩選無所謂儀同三司也是年留孫年六十五其父九十四固宜則儀同爲九德無疑也是時君昏世濁奉釋道如神甚至搜訪賢才亦委之道士致天下貪榮之士趨之若鶩子昂非下愚何至自稱三教弟子噫亦趨時而已中峯名明本姓孫氏子昂夫婦所皈依故曰本師管仲姬之父名仲字直夫倜儻尙義鄉里稱之曰管公無丈

夫子子昂于皇慶元年夏五月因仲姬之請卽管氏廬剏樓三間以祀之並其配因使道士掌之扁曰孝思道院見松雪齋集管公樓孝思道院記卽今金婆寺故址與子昂故宅鷗波亭相望二書本天目中峯精舍中物後歸管公樓否則樓剏于夏五月而經書于春正月又適足增疑竇耳子昂寫佛道經散之名山甚衆見楊載所撰行狀孝思道院爲子昂自剏所施寫經必多惜今不可見矣或謂字畫潦草結構蕩然子昂斷不至此當是子女代筆愚不敢臆斷許信臣中丞謂擺脫閒架獨抒機杼愚尤不敢附和也清

容集四十六卷有題子昂書靈寶經稱其着紙如飛  
歐褚而下不足論乃至治二年四月所書與此不同  
蓋子昂所書靈寶經非一本矣

趙子昂行楷洛神賦跋

趙文敏洛神賦末題曰子昂爲清夫書有趙氏子昂  
朱文方印紙本行楷書紙三接騎縫及起首有趙氏  
子昂之印後有牟巖題有獻之二字朱文方印清夫  
不知何人元有崑山顧信字善夫號樂善處士子昂  
門生也泰定中刻文敏書數十種趙寒山孫雪居目  
爲樂善堂帖清夫或卽善夫兄弟行歟牟巖字獻之  
號陵陽父子才宋史有傳由四川遷湖州巖理宗時  
官大理司直宋亡不仕箸有陵陽先生集卒于至大  
辛亥與子昂時代相接至元己亥子昂年四十六力

請歸改浙江儒學提舉此書之作當在其時故有陵陽題語卷中有寄傲二字朱文腰圓印構李項氏傳家寶玩八字繆篆朱文長印項墨林秘笈之印朱文長印二項元汴朱文方印項子京家珍藏朱文長印子京所藏白文方印一項墨林秘玩朱文方印二延吉二字朱文長印王氏子貞朱文方印文石山人白文方印朱氏象玄白文方印儀周鑑賞白文方印案自寄傲至墨林秘玩皆項墨林印也王延吉字子貞蘇州人王文恪公鑒之長子中歲市鼎彝圖書充扈于家官至大理寺副見陸子餘集朱大韶字象玄號文

石松江華亭人嘉靖二十六年進士官至國子監司業家有快閣富于收藏見松江府志儀周者安麓村也康熙時人著有墨緣彙觀蓋是卷先爲王子貞所藏後歸朱文石又歸天籟閣入 國朝爲安麓村

所得余以董香光盤谷圖序書畫合璧卷易之富樂賀太守太守得之邢文毅後人者康熙中梁真定相國刻入秋碧堂帖後有跋云古詩十九首三百篇之變而不失其正者曹子建諸賦騷辭之變而不失其正者子昂書二王之變而不失其正者有此三美清夫其寶之西秦張模張瓘會稽戴錫嘉興顧文琛同

觀于學古齋據此則原本當與古詩十九首合裝真  
定上石時已失古詩不知何時又並張跋失之耳

跋趙文敏致袁文清書

右元延祐七年庚申八月廿一日趙文敏致袁文清書也文清名桷字伯長自號清容居士大德五年以薦入翰林延祐六年將俟代南歸夏五月由集賢待制超擢直學士遂不果七年乃引疾還旋遣使復召至治元年三月到京二年三月改翰林直學士見清容集己未辛酉壬戌諸祝文及蘇滋溪所撰墓誌文敏于延祐六年謁告四月廿五日出都五月十日行抵臨清管夫人卒于舟次與仲穆護喪還吳興見松雪集管夫人墓誌文清之歸四明也文敏已里居故

日今春聞兄長來歸喜而不寐也文清辛酉祭祖禰  
文有舊歲南歸將一意誓墓語想致子昂札中亦有  
此語故曰誓墓得無太早也文敏生于宋寶祐二年  
甲寅時年六十七歲文清生于宋咸淳二年丙寅時  
年五十五歲故云孟頫衰老無堪兄長才力強健也  
文敏三子長亮早卒次雍次奕管夫人于至元二十  
六年己丑歲來歸見孝思道院記下距延祐庚申三  
十一年雍奕非長子計此時均不及三十歲其子婦  
青年可知故云兩兒媳皆不曾成就也書法遒秀得  
蘭亭聖教神髓前明曾藏項墨林處有子孫永寶西

楚王孫神遊心賞寄傲四印不知何時落于僉父之  
手與鮮于伯機偽迹同裝余一見叫絕証以清容文  
敏事迹無一不合其爲真迹無疑文敏書刻入類帖  
甚多往往真偽參半雖精如三希堂帖不免見第十  
八卷彭  
元瑞此札爲晚年妙迹自元至今未見著錄世無真  
識棄周鼎而寶康瓠于人且然文字乎何尤潛園得  
此之日正五百六十六年前文敏作書之日文敏故  
居與潛園毘隣暑退涼生殘荷滿池明窗展讀想見  
蓮花莊上揮毫伸紙時也

其二

管仲姬歸文敏時年二十九歲文敏三十六歲卽令  
當年生子先有亮而後有雍仲穆之生總在甲寅以  
後吳氏續疑年錄作生于至元己丑則仲姬于歸之  
歲連生二子有是理乎原注松雪齋集有大德甲辰  
雍年十六語今檢元刻松雪齋集無此文也袁清容  
于咸淳二年夏生于臨安是歲大熱茵席器案如執  
焦生七日而母夫人以暴泄卒見自撰先夫人行述  
與滋溪集文清墓誌泰定四年疾終年六十二合錢  
氏疑年錄作生于丁卯亦誤也因並識于此

元勅賜開府儀同三司上卿輔成贊化保運元教太  
宗師志道宏教冲元仁靖大真人張公碑跋

右張留孫碑至治壬戌趙文敏奉勅撰並書丹篆額  
案文敏行狀卒于是年六月辛巳據碑留孫卒于至  
治元年十二月壬子明年三月弟子七十五人歸其  
喪于故山仁宗乃命吳全節嗣封予告治喪命子昂  
著文是碑之作當在至治二年四五月間去子昂之  
卒僅一月餘耳松雪齋人及松雪外人文之爲僧道  
作者甚多獨不收留孫碑恐文與字皆仲穆代筆故  
字與湖州府治碑絕類不然煌煌大篇刻集時反遺

之耶行狀稱至治壬戌春遣使傳旨俾書孝經而未  
及奉勅撰碑事豈以其方外而諱之歟恐亦未必然  
也天歷二年五月立石去子昂之卒七年矣

跋鮮于伯機十詩五札

右鮮于伯機支離叟序及詩十章致悅齋知府札一  
澄虛眞人札三巡檢姪札一有王夢樓潘榕皋兩跋  
案伯機名樞蘄州漁陽人元初滅宋選爲浙江宣慰  
司經歷改行省都事後遷太常典簿廬居杭州之斤  
橋所居曰困學齋自號困學民又取莊子語號直寄  
老人大德壬寅卒年五十七見剡源集困學齋記九  
靈山房集跋鮮于伯機安公壽詞陶宗儀輟耕錄松  
雪集哀鮮于伯機寄鮮于伯機詩陸友硯北雜志支  
離叟爲所植松見遂昌雜錄溫日觀日至鮮于家袖

瓜啗其大龜抱軒前支離叟或歌或笑是也十詩爲元風雅元音元詩選所未收伯機時年五十四越二年遂捐館故子昂之圖無傳剡源集亦無此傳惟序稱大德已亥得松于陳氏廢園明年枝葉盛茂則松得于大德三年詩當作于大德四年而序末仍題己亥必有筆誤曹志堅洞霄宮道士劄授澄虛明敎守正真人至元己卯充洞霄宮副職兼杭州路道敎提點終任見洞霄圖志則與澄虛三札皆至元廿六年以前書也悅齋知府俟考伯機書法與子昂齊名今觀諸札幾欲駕而上之宜子昂推服不置也

元焦粲雪蓬圖跋

雪蓬圖紙本高八寸六分長四尺四寸八分題曰至  
正辛丑冬日焦粲作有焦粲二字白文方印後有淮  
海馬振雪蓬詩後序及溪鹵許銅丹邱吳儁高平范  
立婁城郝節雪莊張樸始豐山人余銓朱吉長沙蕭  
規畊樂子朱煥東吳張節東皋妙聲伯齡龜巢翁謝  
應芳陸端未十五家題馬振之印曰伏波世家曰馬  
印公振曰游戲翰墨許銅之印曰樂在其中吳儁之  
印曰吳儁之印曰廷彥余銓之印曰桐江釣者曰余  
銓之印曰余氏士平日始豐山人耕樂子之印曰聽

雨蓬曰樂琴書以消憂案馬磨字公振太倉人元季  
避兵于松江城南園池亭榭幽閒自娛屏絕世慮日  
誦經史楊廉夫深器重之長于歌詩有醉漁草堂二  
集見顧清松江府志卷三十一吳儒丹邱人元詩選  
錄其三詩其字廷彥則賴此以考見耳范立字叔中  
一字中立錢塘人號玉崖生又號玉崖樵者洪武九  
年有盧兗州挽詩元詩選錄其詩七首余銓安吉人  
洪武十六年以耆儒徵年踰七十上喜賜坐命爲文  
華殿大學士翌日賜勅放還見湖州府志其字士平  
則湖志所未著也朱吉崑山人字季寧澤民先生子

也洪武中以薦授戶科給事中首疏請寬胡藍黨禁以安反側後以善書改中書舍人出爲湖廣僉事有文學箸有三畏齋稿見萬姓統譜張節上海人明初官禮科給事中見顧清松江府志妙聲字九皋吳縣人元末居景德寺後居常熟慧日寺又主平江北禪寺洪武三年與釋萬金同被召莅天下釋教箸有東臯錄徐伯齡字延之錢唐人博學強記曉洞音律尤工樂府嘗雜集瓷甌數十枚考其音之中度者奏曲一章茶頃而罷箸有蟬精雋見萬厯杭州府志謝應芳字子蘭毘陵人兵亂南遷居吳之葑門轉婁江渡

吳淞寓篠徑年踰八十歸老其鄉之橫山平生博正  
好古在鄉常復鄒忠公祠寓吳又請復顧元公祠墓  
箸有思賢錄辨惑編龜巢稿見松江顧志邾節許銅  
朱煥陸端本張朴蕭規俟攷圖有退密二字朱文長  
印子京父印四字朱文方印畢瀧鑑賞四字朱文方  
印跋有項墨林甫秘笈之印朱文長印子京父朱文  
方印竹癡二字朱文長印畢澗飛藏朱文方印此蓋  
前明時經項墨林元汴收藏乾隆中歸于太倉畢澗  
飛瀧余于無錫秦潛如都轉家得之

倪雲林水竹居圖跋

雲林水竹居圖紙本水墨山水爲吳郡曹仲和所作也前有沈雄仲篆書水竹居三字後有俞焯記張緯王令顯孔思搆金玫高恒古顏肅朱炳姚蝦徐衡周凱金貢陸忠賢俞貞木張翼釋宗戒詩莫震跋案仲和名謹又字勉之官訓導元季居平望鎮俞焯字元明號午翁崑山人泰定四年進士官仙居縣丞張緯字德機父監字天民白金壇移居宜興弟經字德常兄弟白相師友文風藹然高士嘗爲緯作荆南精舍圖爲德常作良常草堂圖王令顯字光大宜興人故

宋將家子博學嗜古清閭閣集題贈甚多常延張天民于家爲之買田築室見遂昌雜錄孔思構字基道號肯堂先聖五十四代孫見元詩選周凱字子諒晚以字行廬陵人自號滄洲灌夫有文名洪武二年八月詔修禮書見明史徐一夔傳張翬字翔南先世睦人徙居秀水至正乙巳舉于鄉明初徵入禮局事竣賜白金歸翬博學強記屬文敏捷好爲奇澀語而切于理書宗晉人見秀水志携李詩繫俞貞木初名植以字行更字有立號立菴吳縣人洪武初授樂昌知縣改都昌令蘇州府志有傳金貢字頽伯晚以字行

秀水人邃於經學工書能詩見機李詩繫徐衡字彥  
衡嘉興人以文學稱荆南倡和集有詩陸宗賢字承  
之嘉興人嘗與吳中陳子微相倡和見甯極齋稿沈  
洪字雄仲號東隱吳中富民萬三之後工篆隸行草  
高恒吉初名恒以字行吳郡人顏肅字子邕究人釋  
宗戒吳之廣福寺僧朱炳姚叔皆古鄆人金孜字德  
進號劬生嘉定人元季官長洲縣學訓導洪武初擢  
國子助教是卷明天順初尙爲仲和孫隨若所藏至  
嘉靖中乃爲雲間何元朗所得有青森閣書畫記朱  
文長印乾隆中歸于太倉陸潤之有陸潤之藏朱文

方印後歸于陳良齋司馬德大旋爲沈旭庭布衣易  
得余則得之旭庭者也佩文齋書畫譜六研齋三筆  
吳越所見詩畫錄王文恪姑蘇志蘇州府雅志石志  
皆箸于錄惟雅石二志所載雖祇詩七家而王兩曹  
說陳述三詩爲此卷所無殆屢經兵燹有所缺佚歟

唐子華山水卷跋

唐子華山水卷紙本爲邵孜作款題至正九年後有雷杭七絕余鏞篆書七古楷書釋文 賈七古子華之印曰唐氏子華曰心領神會皆朱文余鏞之印曰尙友齋曰余鏞皆白文雷杭之印曰雷氏彥舟朱文案子華名棣吳興人性善悟章句造次可誦其餘力習繪畫舉筆有師法趙文敏一見奇之仁宗詔繪嘉熙殿御屏揮灑立就天子稱賞詔直集賢院聲聞大震出爲嘉興路照磨除休寧縣尹先是豪民好爲并兼貧民至空產賦往往逋亡棣釐其弊具爲科條擇

任廉吏宿弊一清流逋歸復山民老人擁馬扑謝居  
五年政平化行獄訟止息課爲江東最以老去官民  
涕泣塑像祀之進奉議大夫吳江知州致仕見吳興  
藝文補張羽所撰唐子華墓碣雷杭字彥舟福建建  
安人與兄機棋以易鳴于時嘗箸周易註解行世時  
稱雷氏易浙江鄉試第一人後官儒學提舉遷潮陽  
縣尹以死事贈奉訓大夫奉化州知州見萬姓統譜  
邵孜字思善休寧人梅竹山水得唐棣之妙聰敏能  
文見休寧縣志子華爲吾鄉先哲元史不爲立傳其  
事迹遂不甚顯張靜居所撰墓志僅存于吳興藝文

補世鮮知者此卷子華自題官休寧五載及致仕歸  
吳興等語証以墓誌事皆脗合而畫之逸秀渾厚非  
明以後所能三家題詩又與子華思善生平皆合非  
等敷泛浮辭其爲真迹無疑子華畫傳世絕少誠梓  
鄉之墨寶也向爲秦澹如都轉所藏宗湘文太守介  
紹歸穰梨館



跋潘元諒摹刻淳化閣帖

右淳化閣帖十卷卷一漢章帝書下摹刻賈似道悅生胡盧陽文印卷十末耳字下摹刻似道封字陽文方印後又摹齊周密印章五字陽文印此明人重摹宋拓並摹藏印非宋刻之証也卷一卷十有翁覃溪硃筆題字未能定爲何刻愚參攷羣書定爲明潘元諒刻本請列二証以明之顧汝和撰法帖釋文攷異備列華叔陽文文水潘元諒及所藏宋拓四本錠紋補痕與泉州本缺文同異帖內錠紋補痕與所稱潘本悉合其証一也王筍林閣帖考正引珊瑚網潘顧

二本皆以賈似道所藏重摹而潘本瘦顧本肥今帖模刻似道兩印其証二也潘氏所刻銀錠紋補痕必鈎勒其形後人以墨填之遂在若隱若顯之間耳明人重摹閣帖以肅府潘元諒顧從義爲最善潘本顧本亡于明季肅府雖存殘缺已甚此雖明刻當作宋拓觀可也先爲川沙沈韻初同年所藏有韻初鑒藏各印今歸李崧耘戶部因題其後

溫圓嶠家書跋

右明大學士烏程溫圓嶠體仁家書六通南潯周君  
芸齋之所收也四致其弟仲容一致其弟一官其一  
亦致其弟札首斷爛其名已缺圓嶠相思宗最久當  
國勢阽危之日不能有所匡濟惟務逢君固位嫉賢  
忌能律以以道事君不可則止之義列之奸臣百喙  
何辭惟圓嶠操守尙嚴持躬尙謹既不若嚴嵩之招  
權納賄亦不若馮銓魏藻德之媚璫無恥卽崇禎五  
十餘相中勝于圓嶠者惟文竺塢范吳橋孫高陽數  
公餘皆仲伯之間圓嶠獨被惡名殆有幸不幸耶六

札一言買蓮花莊事一以宣德銅鑪贈弟一爲其叔  
作墓誌一言水賊一言時事一得庶常後勉勵其弟  
並無齟齬不可見人之言宜乎芸齋之清閨不忍棄  
置也吾鄉風俗鄙陋士不尙志惡直醜正習爲當然  
圓嶠囿于鄉俗不能自拔豈知誅心論定終爲下流  
之歸可不懼哉我願後之學者出處進退必權乎道  
勿以玉碎爲戚勿以瓦全爲榮則烏程百世之恥庶  
乎其可雪也時光緒乙酉冬十月跋

吳北海遺札跋

吳北海三札南海周君芸齋之所藏也案北海名夢  
陽字允兆歸安人明季布衣高節尙義有經世之略  
嘗挾策走燕趙不得志歸而以詩自娛新安閔景賢  
輯明布衣詩推爲中興之冠嘗與程孟陽集汪景純  
家聽歌限韻爲數絕句互相激賞箸有射堂詩鈔北  
海集北海不以書名今觀三札筆筆皆導源閣帖詞  
旣高華語尤曠達有晉人風旨洵可貴也時光緒乙  
酉冬十月識于雙樅廬

儀願堂題跋卷五

三

陳老蓮祖師待詔圖跋

右祖師待詔圖款題庚辰春仲客燕京臨丁南羽祖師待詔圖老蓮洪綬下有綬字朱文方印章侯二字白文方印絹本白描案孟遠老蓮傳云累試不第挾策入國學試輒高等一時公卿識面爲榮然所重者書畫耳洪綬慨然賦歸甲申之難作棲遲吳越周櫟園讀書錄云家大人官暨陽時得交章侯以筆墨定交辛巳余謁選再見于都門又云崇禎間召入爲舍人則庚辰辛巳之交老蓮固在京師也題云客燕京與老蓮事迹合其爲真迹無疑老蓮喜畫圖像嘗畫

有屬公信力臣卷之三  
楚辭像刻于山陰又畫小詩牌行世又臨厯代帝王  
像晚年又畫博古牌皆爲世所重祖師待詔亦道家  
不經之談楚辭水滸之流也老蓮卒于順治九年壬  
辰年五十四則此卷乃四十四歲作也

儀顧堂題跋卷十六

歸安陸心源剛甫撰

唐獻陵造像碑跋

碑爲守陵中郎將齊士員立額題太武皇帝穆皇后  
供養石像之碑文字完好先序後銘銘後書右監門  
中郎將右勳衛郎將檢校左右領府郎將長樂宮大  
監定州刺史上柱國延陵縣開國子齊士員備載曾  
祖父妻息官諱又曰開皇之歲宿衛宮闈則士員舊  
事隋氏者也義旗之始授正議大夫左一軍領又云  
大武皇帝升遐奉敕於獻陵供奉生死不離云云後

題貞觀十三年歲次己亥正月乙巳朔一日又有王  
保府折衝都尉趙伽等及三原縣令檢校陵署令崔  
醫王并二陵宿衛人呂村任村等宿老姓名攷唐會  
要載貞觀十三年正月一日太宗朝于獻陵禮畢入  
寢宮閱視先朝服御之物悲動左右冊府元龜卷八  
十貞觀十三年正月乙巳謀作帝朝于獻陵宿衛陵  
邑中郎將齊士員及三原令已下各賜爵一級是立  
碑之己亥正月朔正太宗朝陵之日文不及朝陵事  
或先已刊成耳趙伽等無考惟三原令崔醫王當時  
亦賜爵一級者非此碑則不能舉其姓氏矣冊府

又載貞觀十六年十二月令左監門中郎將齊士員  
將兵衛獻陵帝召士員至望見而降殿自悲咽不已  
謂從官曰頃備新衣珍饌欲以正旦奉荐園陵朕若  
親行便勞扈從不欲勞人乃自抑止因命江夏王道  
宗代行所獻之物帝並跪授道宗焉

儀顧堂題跋卷十六

二

唐相州鄴縣天城山修志寺碑跋

碑在鄴縣立于開元三年三月張佑仁撰文八分書  
結銜書前太子較書直崇文館兼左衛率府兵曹參  
軍敦煌張佑仁撰直字上畫泐似金字館兼二字僅  
存彷彿敦字尚可辨煌字則意索而得之唐書崇文  
館校書郎二人從九品太子率府其屬兵曹參軍從  
八品下皆東宮官屬安陽金石錄卷十三箸于錄誤  
題前太子較書金崇文兼左衛率府兵曹參軍張伯  
仁分一人而二人想由拓手不精考之未審耳

符載亡妻李氏墓志銘跋

碑首題亡妻李氏墓志銘孤子符載述文有鄙人編  
公陰有輔助云云又全唐文符載有祭亡妻李氏文  
則李氏載之妻也李氏以貞元十三年卒權窆於潯  
陽德化鄉至元和七年載丁父艱歸葬鳳翔始以夫  
人祔于先墓故曰因得啟發祔于皇先姑之側謂從  
載母葬也載志墓時正居父喪故題曰孤子蓋祔于  
舅姑宜統于所尊耳宏農楊夫人者當爲載之後妻  
自李之卒至是凡十六年矣汪硯山謂載謂父曰鄙  
人爲悖謬非也

唐大理卿崔公故夫人滎陽縣君鄭氏墓志銘跋

誌馬懷素撰崔公不著名攷之乃崔元暉之弟昇也

舊唐書

元暉傳昇司刑少卿世系表昇字玄樂刑部

侍郎子璘焉翊太守兼采訪使璘子璉不著官爵據  
碑云長子司農丞璘次子華州參軍璉則璘璉爲兄  
弟世系表誤下一格以璉爲璘子也夫人曾祖子仁  
齊通直郎祖植司勳左司郎中長安令將作少匠檢  
校太常少卿父行寶詹府司直司勳員外郎植與行  
寶見郎官石柱題名植司勳郎中行寶題名作行寶  
司勳員外郎當以碑爲正餘所歷之官皆可補史之

闕史稱元暉與昇尤友愛怡怡如也元暉之母氏盧  
見本傳碑云與長姒盧夫人深相友敬卽元暉妻蓋  
與其姑並盧出也夫人之亡以長安三年正昇爲司  
刑少卿日其助宗璟劾張昌宗事在四年唐志光宅  
元年改大理爲司刑神龍元年復舊稱誌作于開元  
五年云夫以義口家室想琴室而增懷則其時昇猶  
在也其由少卿躋正亦當在斯時表稱刑部侍郎則  
開元五年後所歷官

唐金滿州都督賀蘭軍大使沙陁公夫人金城郡君  
阿史那氏墓誌跋

碑云夫人姓阿史那氏繼往絕可汗步真之曾孫竭  
忠事主可漢驃騎大將軍斛瑟羅之孫十姓可汗右  
威衛大將軍懷道之長女也按史西突厥傳貞觀中  
遣使立阿史那彌射爲可汗族兄步真謀奪其位衆  
不厭去之步真與族人來朝拜左屯衛大將軍後平  
賀魯以步真爲繼往絕可汗濛池都護乾封中步真  
死擢其子步利設斛瑟羅爲右玉鈴衛將軍武后更  
號斛瑟羅爲竭忠事主可汗聖歷二年舉其部六七

萬內遷死于長安擢其子懷道爲右武衛大將軍長安四年以懷道爲十姓可汗兼濛池都護與碑悉合金滿州者永徽四年卽處月置史稱龍朔初授處月酋沙陀金山墨離軍討擊使長安二年進金滿州都督累封張掖郡公金山死子輔國嗣先天初避吐蕃徙部北庭率其下入朝開元二年復領金滿州都督封其母鄯國夫人後累爵永壽郡王是沙陀公者碑雖不著名其爲輔國無疑也夫人卒于開元七年年二十五上朔年十七歸于沙陀氏正先天初輔國入朝時夫人爲懷道長女史又稱突厥施別種車鼻施

啜蘇祿開元中來朝帝以阿史那懷道女爲交河公主妻之是懷道女不止金城郡君矣後輔國死子骨咄支嗣骨咄支死子盡忠嗣卽後唐李克用曾祖惟輔國之爲賀蘭軍大使于史無徵



唐故三十姓可汗貴女賢力毗伽公主雲中郡夫人  
阿史那氏墓志銘跋

碑首書駙馬都尉故特進兼左衛大將軍雲中郡開  
國公踏沒施達千阿史德覓覓達千者虜世官阿史  
德虜姓突厥如善可汗之裔歸唐者有司寶卿阿史  
德元琬右武衛大將軍阿史德多覽之襄都督阿史  
德樞寶覓覓亦其後曰天上得果報男曰聖天皆虜  
自稱語據史則骨咄祿死子幼不得立其弟默啜自  
立爲可汗今牽連書骨咄祿默啜可汗不可解及考  
通鑑開元二年夏四月突厥可汗默啜復遣使求昏

自稱乾和永清大駙馬天上得果報天男突厥聖天  
骨咄祿可汗是默啜之稱謂與此碑悉合曰家國喪  
亂藩落分崩委命南奔歸誠北闕史載默啜討九姓  
拔野古拔野古大敗默啜不爲備道大林中殘衆突  
出擊斬默啜傳首京師事在開元四年又默啜死骨  
咄祿子闕特勒合故部攻殺默啜之子小可汗又先  
是默啜屢擊葛邏祿等詔所在都護摠管犄角應援  
虜勢浸削其壻高麗莫離支高文簡與蹊跌都督思  
太等合萬餘帳款邊詔納之河南引拜文簡左衛大  
將軍遼西郡王然曰家聲犯法身入宮闈所指家聲

當非文簡予以爲公主入漢封雲中郡夫人覓覓封雲中郡開國公是犯法者卽指覓覓曰故特進則知覓覓已先死矣曰住天恩載被禮秦晉於家兄家兄卽三十姓天上得毗伽然可汗也住當爲徃字之誤按史默啜死骨咄祿子闕特勒立其兄默棘連是爲毗伽可汗然者虜典兵之職有左殺右殺史稱毗伽本謂小然故曰毗伽然史又載默棘連盡有默啜餘衆因乞和請父事天子許之又遣使獻方物求婚乃遣鴻臚卿袁振往諭意默棘連曰二蕃皆賜姓而得尙主且公主亦非帝女我不敢有所擇但屢請不得

爲諸國笑振許爲請或朝廷因此許以公主下嫁如  
交河公主故事未可知也曰因承胤澤特許歸親兄  
右賢王默特勒私第特勒當作特勒史載可汗之子  
弟謂之特勒然如契苾明碑柳公權神策軍碑皆以  
勤爲勒蓋書者之誤墨特勒者默噶子也史載下詔  
伐默棘連以契丹都督李失活及突厥默噶子左賢  
王墨特勒左威衛將軍右賢王阿史那毗伽特勒燕  
山郡王火拔石失畢等蕃漢凡三十萬以朔方道大  
摠管王陵統之事在開元七年是墨特勒之爲默噶  
子史有明徵特碑稱右賢王史爲左之不同耳公主

薨于開元十一年六月其年十月癸巳朔以通鑑目錄攷之合男曰懷恩當爲覓覓子蓋公主初嫁于阿史德覓覓覓犯法死公主沒掖廷後許歸墨特勒私第將改適毗伽燕末嫁而薨故誌文題覓覓衡從前夫黃本驥跋是碑疑子懷恩卽僕固懷恩固非若主言萃編補略則滿紙悠謬更無一是矣



滎陽縣令王泉移碑記跋

此蓋滎陽縣令盧正道清德碑側攷寶刻叢編清德碑神龍三年劉穆之撰故是碑云勒書爲碑舍人劉公作後題貞元十八年二月十日滎陽縣令王泉記元字殘泐初疑貞觀反覆審之以元爲近蓋天寶時盧重華移于道周而貞元時兩頻壞道又爲雷仆故王泉復移于縣門因刻是記全唐文所收盧府君碑陰記卽此闕字甚多且以天寶八載十一月十八日縣尉盧重華自廢寺移于道周以全故也廿六字置於文首今閱石刻則此廿六字月作大字書於上方

貞觀時有王泉者官內侍省給事有沙門不拜俗文  
見宏明集與此王泉當別一人趙搗叔錄作縣尉盧  
重華移石記者誤謂在裴琳德政記後者疑亦非

臨淮王李光弼碑跋

光弼之母史以爲李碑以爲武王述庵司寇執碑而議史之誤非也攷唐書契丹傳武懿宗婁師德等爲大總管擊契丹大敗之降別將李楷固駱務整久視元年詔左玉鈐衛大將軍李楷固右武威衛將軍駱務整討契丹破之又狄仁傑傳是時李楷固駱務整部將數挫王師後降有司請論如法仁傑稱其驍勇可任若貸死可以責功至是凱旋后舉酒屬仁傑賞其知人授楷固左玉鈐衛大將軍燕國公賜姓武務

整右武威衛將軍是楷固本姓李賜姓武史有明徵

碑中爲國飛將一語亦暗使李廣事

萃編及文集皆誤作大將魯

公書其賜氏豈亦以同姓爲嫌耶然光弼楷固之先

皆以夷族賜國姓正不必斷斷以吳孟子爲譏碑凡

三千七十餘字金石萃編所收不及半此本磨泐者

才三百字洵足寶貴惜爲潢工翦棄者二字

思明奔北于百

里之外落奔字都知河南云云落河字

其可訂今本魯公集之譌者得

二十餘條具別紙

臨淮王李光弼碑第二跋

此碑足訂魯公文集之謬者如題額都督河南云云碑作都知山南東道五節度碑作山南東五道節度保父王室翼戴三聖碑作以翼戴三聖多以字與上以左右宣王文義相應公卽荊國公之第四子碑無國字與下擇荊公配焉文義同社稷威寶碑作盛寶爲國大將碑作飛將嘗撫鹿而遊碑作撫塵撫塵而游語出東方朔與公孫宏書雖已官達碑作宦達擒其心腹碑作心手魯公撰其曾祖勤禮神道碑述杲卿亦有開土門擒其心手何千年高邈之語又杲卿

儀禮堂題跋卷十六 三

神道碑屬祿山使其心手高邈往范陽是心手當時  
習用語至德二載碑作二年秉燭徐行一夜方達碑  
作乙夜一身必以死國家之患碑無必字國家上尙  
有一字已泐似衛字言一身以死衛國家之患文義  
方足其年改元上元冬十一月碑作十二月肅宗不  
能違之碑作肅宗難違之二月拜開府儀同碑作三  
月賜鐵券賜下尙有一字已泐似公字疾病增劇碑  
作利疾追贈太保十一月下闕二字碑作十二月闕  
字似景戌二字次曰太府少卿太僕卿象碑於少卿  
下尙有一字似兼字王國多難碑作主蒙多難主上

尙有三字或原空思明挫銳于恆之祿山絕望於江  
淮碑作使思明羅跪挫銳于恆之祿山側息絕望于  
江淮保河陽而雲梯罔冀碑作雲梯四翼次曰光顏  
碑作光彥皆以將略碑作皆有材略凌霄翼聖集於  
凌上闕二字碑當翦斷處闕與否不可知玩上下文  
似無闕且凌霄地名非頌聖語亦不必空格惟翼下  
聖上碑原空三字賀拔行臺與兄雍州碑作荊州風  
樹寂寞碑作寂寥經營朔方碑作冀方壇山路旁碑  
作檀山魯公文集至宋無傳嘉祐中宋次道撫采金  
石編爲十五卷是碑在宋初必尙完善次道所見與

今本不應有異想當時之傳抄後世之摹版轉輾承  
譌遂致參差耳

臨淮王李光弼碑第三跋

唐書宰相世系表柳城李氏有二一爲光弼一爲寶臣述庵司寇跋此碑誤見其後而遺其前云令節重英楷洛皆不在表內非也跋又云賊將周智傳作周摯今此碑明箸周贇非周智皆爲疏舛至李光進之爲渭北節度傳雖不箸而回紇傳云郭子儀率麾下叩回紇營時李光進路嗣恭介馬在側子儀示酋長曰此渭北節度使某朔方軍糧使某是光進之爲渭北節度正子儀軍騎見虜時也又契丹傳延和元年以左羽林大將軍孫佺左驍衛將軍李楷洛左威衛

將軍周以悌帥兵擊奚楷洛與奚酋李大酺戰不利  
佺懼歛軍詐大酺曰我奉詔來撫慰而楷洛違節度  
方戮以徇出軍中繒帛與之大酺謝請佺還師舉軍  
得脫爭先無部伍大酺兵躡之遂大敗佺以悌皆爲  
虜禽送默啜害之朝廷方多故不暇討云云亦見孫  
處約傳此楷洛事蹟見于史者李肇國史補載德宗  
常命楊崖州打李楷洛碑釘壁以玩又光弼之兄世  
系表作遵宜此碑作遵直足以正史之誤

富義監使扶風公造彌陀殿記跋

右碑十八行行二十九字不著書撰人名氏各家皆

未著錄中有大蜀云云末有時武

下缺

戊辰四月辛丑

朔以通鑑目錄考之戊辰爲唐亡之次歲前蜀王建

始建號武成之元年其年四月辛丑朔與碑合富義

屬劍南道瀘州五代史乾甯三年建遣王宗侃等取

渝瀘州殺瀘州刺史馬敬儒至此凡十四年文有兩

紀臨而恩威並布語則扶風公者亦唐臣而降蜀者

耶杜光庭焰陽洞記乾德三年并監使保義軍使太

保馬全章開陵州焰陽洞

十國春秋作馬全義

陵與瀘爲鄰郡

唐書食貨志謂劍南東川渝瀘資榮陵簡等州有井  
四百六十文獻通攷蜀鹽有富順之井監西和州之  
鹽官長甯之清井皆大井也則井監使者當卽富義  
監使然則扶風公疑卽馬全章也

唐文安郡王張公神道碑銘跋

張維岳兩唐書無傳據碑始從郭子儀繼隸李光弼  
後事僕固懷恩蓋河中節度麾下將校曰清渠之戰  
特拜左衛將軍事在至德二載子儀及安慶緒將安  
守忠戰事然清渠實大敗不知何緣授維岳官曰太  
尉李光弼扼河陽之險制覃懷之寇事在乾元二年  
十月則光弼與思明戰事曰李國貞繼掌師律身戕  
衆潰攷史上元二年八月殿中監李國貞爲朔方河  
中節度使明年寶應元年建卯月河中軍殺李國貞  
曰僕固懷恩之授鉞也公閱視才力穀之引滿藝成

徹札者凡二千人署曰平射營攷侯仲莊傳謂僕固懷恩以朔方反仲莊爲都將訓兵自守號爲平射人畏其鋒或維岳亦預其事曰懷恩之遁封漢東郡王攷子儀傳懷恩子瑒屯榆次爲帳下張維岳所殺傳首京師撫其衆歸子儀而懷恩傳則謂斬暘者爲焦暉白玉疑焦暉白玉爲偏將亦統于維岳者及考溫公通鑑載僕固瑒發祁縣兵士卒未食行不能前至榆次瑒責其遲士皆怨其夕十將焦暉白玉帥衆攻瑒殺之懷恩渡河北走都虞候張維嶽在沁州聞懷恩去乘傳至汾州撫定其衆殺焦暉白玉而竊其功

以告郭子儀子儀使牙官盧諒至汾維嶽賂諒使實  
其言子儀奏維嶽殺瑒後子儀知盧諒之詐杖殺之  
故碑諱其事亦見邵說之文於是非尙不刺謬也維岳  
本無赫赫大功初則竊人之功以成名而官至大將  
軍封文安王亦幸矣哉子益王府長史曼左監門衛  
率府錄事參軍杲太子司議郎晟崇文生彞及母弟  
有志皆不著於史



王美暢夫人長孫氏墓誌銘跋

碑首行題口口汧州口口王美暢夫人長孫氏墓誌  
銘美暢唐書無傳新表烏丸王氏鄭州刺史思泰子  
美暢字通理司封郎中薛公實刻叢編引集古錄目  
益州都督王美暢碑薛稷撰美暢太原祁人官至潤  
州刺史女爲睿宗德妃景雲中追贈都督至石刻口  
峯塔院記謂官水部員外主爵郎中陳鄂饒潤四州  
刺史然則碑首缺字當爲潤州刺史無疑誌作于長  
安中時女未爲睿宗妃故無一語及之夫人曾祖敞  
隨金紫光祿大夫宗正卿平原郡開國公元和姓纂

儀顧堂題跋卷十六 六

後周絳州刺史兕生熾晟做義莊做宗正少卿汴州  
總管生无庸右監門將軍唐書世系表做平原安男  
誌又云祖義常唐通議大夫華容郡公父朝散大夫  
懷州河內令瀛州司馬不署名義常卽无庸義父常  
庸形聲之譌姓纂傳寫誤也當以碑爲正誌但云子  
昕等攷之世系表昕居長司農卿薛公有弟五人警  
翼彌玢輝碑皆從略長安志七汝州刺史王昕宅昕  
薛王業之舅文獻通考王德妃生惠宣太子業故昕  
爲業舅也

唐龍花寺臨壇大德韋和尚墓志銘跋

大德姓韋氏京兆杜陵人杜陵漢縣在萬年縣東十五里和尚萬年人也曰元和歲戊戌四月庚辰滅化以七月乙酉遷神于萬年洪固鄉畢原戊戌元和之十三年其年四月爲甲寅朔庚辰乃二十六日七月癸未朔乙酉乃三日也皆與通鑑目錄合畢原在縣西南二十八里成王葬周公於畢是其地曰曾王父諱安石大父諱斌唐書皆有傳官位均與碑合曰烈考諱袞皇司門郎中眉州刺史宰相世系表袞駕部員外郎不言其爲郎中與刺史當以碑爲正袞子有

同懿同休同憲卽和尚之諸弟碑所云指北原而告  
之者元和戊戌年六十六上朔天寶十二載癸巳爲  
和尚始生之年曰年十九得請而剃落正大厯六年  
辛亥碑所稱大厯六年制隸龍化寺卽爲此年事撰  
文者爲從父弟鄉貢進士同翊宰相世系表斌子衮  
逢逢生同翊字啟之卽其人

平□□□軍兵造彌勒像設半□齋記跋

此碑摩厓字左行後有劍南東川節度左押衙討除  
榮瀘等州□賊都知兵馬使云云李栖元銜名又有  
節度判官等王處恭彭泰元伯良三人署銜碑有云  
相國摠缺五集甲兵上將李栖元署都知兵馬使考

唐會昌五年杜悰罷相以尚書左僕射出爲劍南東  
川節度此所云相國杜悰也又云將軍有良佐軍淬  
太原公卽碑後署名之王處恭也李栖元等四人皆  
不見於史榮瀘逼處夷獠是時有黎宜滿等作亂栖  
元討平之軍士造像以紀功績撰文者爲鄉貢進士

文口名已泐獨異武宗于會昌六年三月崩宣宗立  
明年丁卯改元大中碑書會昌七載丁卯歲二月十  
日卽大中元年也

會昌

當是時兩川無事綜以宰

相爲節度栖元等亦非鄉壁小民不應新君踰年改  
元猶不知大中之號況其時方毀天下佛寺復僧尼  
爲民而猶刻造佛像唐之號令不行於斯可見碑首  
題平口口口軍兵造彌勒像設平口齋記平下三字  
甚泐彷彿茂承濠三字然無佐證太平寧宇記戎州  
東界瀘州北界榮州其土有四族黎蒯虔牟夷夏雜

居蠻獠之類不識文字是黎宜滿者當卽四族之一  
碑又云口兵于應靈應靈縣名本曰大牢天寶元年  
改今名屬榮州碑在四川劉燕庭金石苑未收



蜀先主廟記并碑陰跋

蜀先主廟記乾甯四年九月郭筠撰述涿州刺史婁居□修廟之文居□名缺一字按亭林金石文字記云其首行曰婁居道重修則缺者乃道字順天新志作乾符四年蓋沿孫氏竄宇訪碑錄之誤碑陰攝涿州刺史劉守文立石卽新修順天志所稱常尙貞修廟記爲光化元年十二月卽乾甯四載之明年也記有云太保彭城王者劉仁恭也時爲幽州節度刊碑陰之劉守文者其次子婁居□於史無徵碑陰云公本姓常名尙貞是尙貞卽居道也乾甯四年正月自

武州擢涿州因薦冀而修廟至秋命郭筠撰此記無  
何解去守文攝刺史次年改元光化遂再刻於碑陰  
順天新志分而二之恐非也五代史劉守光傳仁恭  
叛克用光化元年遣其子守文襲滄州逐節度使盧  
彥威遂取滄景德三州請命于昭宗欲以守文爲橫  
海軍節度卽是年事至昭宗遲回未許仁恭復以嫚  
詞邀之卒允其請當爲光化二年事故署銜無橫海  
節度之稱且碑陰記亦祇述婁修廟事無一語及守  
文可知守文非撰文者先舉官之最尊者署銜于石  
之前唐碑往往有此故曰立記下有盧龍節度□□

官數字乃撰文者署名處泐不可辨



梁新修南溪池亭及九龍廟等記跋

右碑立于後梁貞明三年撰文者陳留蔡曙銜署同  
禮觀察判官碑有云按梁載言十道誌云馮翊縣東  
南缺一里有泉九穴同流卽此處也攷之太平寰宇

記馮翊縣九龍泉在縣東南八里有九穴同爲一注  
因名九龍今謂鵝鴨池據此則碑所缺者乃八字也  
又云咸通中太守王龜爲理之暇葺亭而名之龜字  
大年唐書附王播傳咸通中知制誥改太常少卿同  
州刺史與碑合又云庚子歲大寇犯關遂至燼滅庚  
子爲廣明元年是歲黃巢陷潼關厥後連擾關中同

州之陷在中和壬寅舉庚子以例之也又云乾甯歲連帥公瑋再營斯構連帥下缺一字以碑中王公始作而未究其妙李公繼踵而罔盡其工核之則知所缺者爲李字李瑋史無傳附見於薛五代史李罕之傳始爲罕之部曲唐書朱宣傳乾甯三年克用使其將李瑋以兵屯葦援宣爲羅宏信所破後唐本紀載天復元年汾州刺史李瑋據城叛以連汴人武皇令李嗣昭李存審討之嗣昭攻城三日而拔擒瑋斬于晉陽市嗣昭傳略同蓋卽其人也冊府元龜乾甯四年以韓建兼輔國軍節度初李瑋領同州瑋茂貞養

子帝將討之璿逃鳳翔至是命建兼之是璿常領同  
州故曰連帥又云我太傅武昌程公即前署銜之程  
暉也攷宋友謙傳貞明六年友謙遣其子令德襲同  
州遂節度使程全暉歐史本紀書友謙襲同州殺全  
暉薛史則謂全暉單騎奔京師碑作于貞明三年正  
全暉爲節度之日文中又有都指揮使劉敬德左靜  
安指揮使丁約都押衙員建皆節度屬官未有所考



顯陵司部蜀國夫人建尊勝幢記跋

是記爲顯陵守當使侯殷述訪碑孫趙兩錄皆不著于錄其云顯陵司部蜀國夫人崔氏則晉高祖宮人也五代會要高祖內職祇載潁川郡夫人蔡氏新舊兩史皆不詳五代時之內職有司簿碑作司部通假字也崔氏可補史之闕幢建於周廣順三年癸丑四月辛亥朔二十一日庚口以通鑑目錄攷之是年四月當爲庚戌朔今云辛亥不合然二十一日爲庚則月朔當爲庚戌無疑云辛亥乃書碑者誤也是時距晉亡七載距顯陵之葬亦祇十年時雖未久事歷三

儀顧堂題跋卷十六

三

朝故有頻更興廢愴惻徒增之語而顯陵守當使之  
官未替見五代時于易代之際優待前朝非後世之  
比薛史周本紀廣順元年四月壬寅詔莊宗明宗晉  
高祖三處陵寢各有守陵宮人並放逐便如願在陵  
所者依舊供給是崔氏者蓋守陵宮人也

故鳳翔節度使秦王贈尚書令李公楚國夫人朱氏  
墓誌跋

朱氏碑稱友謙之女秦王尚書令李公不著名蓋李  
從贇妻也碑于友謙字空二字考諸史乃字德光初  
爲陝州節度後徙鎮河中故碑曰初留司于陝服後  
節制于蒲津友珪弑太祖友謙附於李克用友珪使  
康懷英等擊之友謙與李克用出澤潞大敗之故曰  
季弟臨朝嗣君失德果因協比之謀克就中興之業  
云云皆與史合友謙妻張氏見五代史本傳惟燕國  
之封不著從贇茂貞之子善書畫莊宗拜鳳翔節度

歷鎮宣武天平廢帝立復以爲鳳翔節度卒年四十  
九秦王尙書令新五代史無文舊史稱莊宗時入朝  
兼中書令晉本紀天福三年進封鳳翔節度使李從  
巖爲秦王夫人卒于漢乾祐二年年五十一時從巖  
已亡未久故碑有偕老莫諧又未畢三年之制已縈  
二豎之灾等語又云兼以盜據城池公行剽掠因茲  
駭愕遂至彌留考之史乾祐元年河中李守貞永興  
趙思綰鳳翔王景崇相次反王景崇傳稱景崇爲鳳  
翔巡檢隱帝立諷鳳翔將吏求已領府事朝廷拜景  
崇邠州留後以趙暉爲鳳翔節度景崇乃叛與趙思

縮其推李守貞爲秦王帝卽以趙暉討之明年景崇  
自焚死卽其事也然則景崇者從曦之舊部以從曦  
卒求節鉞不得乃復假秦王號以推守貞賴此誌可  
得當時情事而夫人之亡適際其叛亂時也有子十  
三人惟永吉見于舊史從曦傳云歷數鎮行軍司馬  
碑以爲第二子也壻五人撰文之許九言居其次又  
有蘭陵蕭渥供奉官趙延祚鄜州節院使焦守珪皆  
未有攷惟左龍武統軍趙匡贊爲趙延壽之子歷漢  
周兩朝累授節鎮及統軍使後入宋歷鎮廬延邠鄜  
四州見五代薛史

